

PHILIPPIANS

Paul-hu Philippi ekaresia jejämade jöhoje.

1 ¹O asë'e Iesu Keriso'o gemuore jëvoromo God-are ariböviéro jëvë'ëro Philippi amore raromarujoho Paul na'o Timothy'o Iesu Keriso-are mu vaejajarue ae niö'i noro jemesi örire jejëmijö gare. O ekaresia muebejëvaruje ariböviohu'o ekaresia ajëmijaruje ariböviohu'o jemesi örire jejëmijö.

²Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu Philippi ekaresia uehorovoromo God'o jö jövonövade jöhoje.

³Naehu jemë uehorovëvë'iroho jemëni God nasi Börömoho huë mae uavajeje. ⁴O jemëni God-are örire jö jövë'iroho nimorohë'i jöho majahijajeje. ⁵Rabëni hesi bëhoho mami'e jemëhu aevol'i na'o bimuvoromo Keriso-are jö ma hesi mu ajemijarijoho éhi ajemibe ruejuvo jaruwohu'o éhi gemuoho ajemijarujeje. ⁶Éhuni na mae uehorovoromo uvajaje: God-ro mabëhe aevoromo jemesi dë vövöbajo'o avohëvadoho iae éhi avohëvobe va'oluvo hujeji Iesu Keriso-are majaho rue'iramu avohëvo barë'ajëjo. ⁷God-hu jemë éhi avohëvobe va'a'ajë uvajoho ého iae maeje é hesi bëhoho jemë nasi dë vövöbajo'ere jëvë'ego. Jemë na'o gemuore mu mabëhe baejë'e jëve. God-ro mu mae bojemamu urimoho na savoji gagoroho bogo hijë'iro hesi jö ma hesi jöhuni biririvoromo majëhibe rovodoho jaruwoho na savoji gagore hijë'i éhi gemuoho majëhijajeje. Jemëro éhi jië'e mu mabëhe na'o bimuvoromo ajemibe rovë'le jëve. ⁸Röhu Iesu Kerisoro nasi dëre rumorovevego na jemëni sisë maro vavaenegajeje. God-ro ge'ego na mae uëve.

⁹Röhu ave jöho na jemëni éninamijajeje. Naro uavajeje huro jemë ajëmijego jemë simane mae jioromo mue bövie bise'e garomo ae rajahuijarujoho gö'o gö'o döre éhi'obe va'oromo ¹⁰éhuro rabe rabe maho jiego ga'irarijego. Éhi jië'oho Keriso-are majaho rue'iramu jemë jö sisëho bogojëvo'i uhohu'o ma-maemu jëvo'ë'e. ¹¹O Iesu Kerisohu ajamuego vaejarue mu mahuro jemë'o rumorovëvö'ë'e éhuro God-are ihoho dö maro ajiomoröhego.

**Paul-hu hi juvonövade hesi bëhoho Keriso
uehorovoromo juvonövade jöhoje.**

12 Röhu nasi ö mueno'e na nege jeméro ave jöho ga'irarijego. Na ave savoji gagore hijamu mu rabehu rabehu nasi örire rovadohuro éhuro Keriso-are jö ma hesi muoho bogo sisérë'i marejë'eje. **13** Marëjë'ëro éhu'ëro sa'a a börömo hesi javu atovarue ariböviohu'o a ioro'iore aho'obëhe jabu'o mae garomo uvoruomajeje: Nörö Keriso-are aëro jië'ëro savoji gagore hijajëjo. **14** O Christian ö mueno'e marohë'e maëro gevarue na savoji gagore hiromo mae biririvego geromo jabu'o daruge baeromo éhuro bogo juhuonivë'e mabëhe biririvoromo God-are jöho majëhijarueje.

15 Éaribövioho a ioro'iorohuro iae nasi mu mahuni dë vörönimoromo na iosiremil'irögoro Keriso-are jöho majëhijarueje röhu a ioro'iorohuro huë mae bojemil'i ë'arueje. **16** Jabumë uvarueje: God-ro nörö aviae bamade höjo éhuro aëro God-are jö maho sareri'e atego nöröro aho'iröhego. Éhuni jabumëro na mae uehorovevoromo Keriso-are jö maho majëhijarueje. **17** O è aribövi ioro'iorehu Keriso-are jö majëhijaruoho bogo maho uehorovoromo è'i a'i jabesi ihohemu uehorovoromo Keriso-are jöho majëhijarueje. Jaburo uvarueje: Noehu Keriso-are jö ae majëhijë'ohuro éhuro a masijohuro heromo Paul savoji gagore hijajoho röhu gö'o döre i'ue bojamil'aruëromo éhuni Keriso-are jöho majëhijarueje.

18 Röhu ého hesije. Aehu ma-döhemu uehorovo'i o uhohu'o uehorovo'i o diehi uehorovoromo Keriso-are jö majëhijaruoho röhu aëro Keriso-are jöho iae majëhijarueje. Na ého uehorovoromo nimorohajeje. Röhu bogo vuonugo'i éhi gemuoho nimorohonövo'ejo. **19** Èhesi bëhoho naro garomo uvajeje: Naehu éhi sisë'i hijajoho jeméro nasi jöëni èninamil'iramu Iesu Keriso-are Aru'ahohuro ajemil'iramu éhuro na mae hi'ejöjo. **20** Èhuni naehu ave uehorovajohuremu nego avohe na bogo mae bogo javojoho baeromo muoho vuonugo'i a'i majae aho'o röhu avevejö'ohu'o biririvo avohoromo nasi arijo'arije aho'o bojamirovego Keriso-are ihoho dö maro jioröhego. Na ave sa'are hijë'oho o guomevë'oho éhi gemu jiojöro nege. **21** Na ave sa'are hijë'oho Keriso gemu uehorovë'i hibe juvajeje. O guomevë'oho jaruwo sisë'i hijanovajoho ijönö mabëhe hi'ejo. **22** Na ave sa'are ègo'o hijë'oho éhuro i'o mu'e birohonövo'ejo. Hesi nani'o diehi ë'ejo. **23** Na uehore niö'i jevo'ego ého uehorovë'e hije. Iae na nege guomoromo sa'aho vuonugo'i va'o Keriso'o gemu mae hi'irodëni. Hu'o hijë'oho ého mahoje. **24** Röhu naehu biririvoromo sa'are hijë'oho ého börömohoje jemë ajemil'irodohuni. **25** Èho na eni gavë'e jeve. Èhuni na garomo uve: Naro biririvoromo jemë'o hi'ejöjo éhuro ajëmego Keriso mae uehorovobe nimorohobe val'irarijego. **26** Èhi jië'oho naro röhu maho ö'iramü jeméro na geromo Iesu Keriso-are örire mabëhe rajahi'aruje.

27 Röhu na diehi jevë'oho jeméro Keriso-are jö maho eromo raromo jijihore. Èhuremu börömohoje. Èhi ë'ë'oho éhuro naehu ö'oromo

gëvë'oho o öre égo'o hiromo ma-jemesi jöhemu hejë'oho na garomo uvo'ejo: Jemëro gemuoro riravoromo uehore gemu baeromo mue gemu nimoromo jö ma hesi muohuremu biririvoromo nigemarujejö. ²⁸ Biririvoromo nigemoromo jemesi jö bijönimoruomaje aribövioho bogo juhuonémijarujëjo. Bogo juhuonémijamu gëvë'ohuro éhuro God-ro rójëhijajeje jabuméro garöhego maja ijönöho jabumë sisëréjëvo'i jemë marojëvo'iröhoho jëvego. Iae God-ro jemë ajémi'liramu marojëvo'ë'e. ²⁹ Jemë Keriso-are mu börömoho niö'i baejë'e jëve. Göho Keriso-are örire mae uehorovo'irarijoho göho hesi jöeni vi'ehe bae'irarijoho. ³⁰ Urimo jemë iae gavarijeje na sivohoromo Keriso-are muoho nigemamu. O jaruvoho jemë hejarujeje aëro uvoruomego: Nöröro éhi gemuoho ë'aje höjo. Röhu ë mue gemuoho jemëro na'o bimuvoromo éhi sivohoromo ömo'aruje.

**No bogo nosi nimaruohemu uehorovo'i göehu
gó huë baerovo'iröhe jöhoje.**

2 ¹Jemë aho'o Keriso-are ae gemuoho jëvajoho na jemë éhuro hejarujeje biririvëvego. Kerisohu jemë huë baejëvajoho na jemë éhuro hejarujeje jemesi dë vövöbajo'oho giogovëvego. Na jemë God-are Aru'ahohu'o gemuoro jëve. Na jemë göëro göhuni vavaenimoromo dë vövöbajo'e aho'o uehorovëvarujeje. ²Éhi jëvë'e jiaje éhuni ma-gemuoro jioromo uehore gemu baeromo huë baerovë'e muoho gemu vaerego na heromo nimoroho avoholiro. ³Nadi jemesi sinohemuoho uehorovoromo a iorol'ioroho éma iosirëmiromo ihoho döroho bamorovo'i uehorovoromo muoho vae'irögoro a'i ma-u'emu uehorovoromo a iorol'ioroho masije hö uvoromo jabesi ihoho döro bamore. ⁴A iorol'ioro jabesi ihoho döro bamoromo röhu nadi jemesi jöhemuoho uehorovo'i a'i a iorol'ioro jabesi jöhu'o uehorovore.

**Kerisohu hesi nimajoho bogo uehorovo'i sa'are rueromo
God-are jöhemu ejahadëhi noehu éhi ë'iröhe jöhoje.**

⁵Iesu Kerisohu uehorovadëhi éhi uehorovore. ⁶Hu God jjajëhi éhi jiël'ëro röhu bogo uvadeje: Naro biririvoromo God-hu hijajëhi éhi hi'ejöjo. ⁷Hu bogo éhioho uvo'i bövie bise'e nugöl'ämäromomo mu vaejahuaje a jjajëhi éhi jiadeje. Ma-a javuajëhi éhi jiadeje. A nu ano'o va'ëne jioromo ae aho'obëhe nosi nunire rovadeje. ⁸Rueromo hesi iho börömoho uehorovoromo vuonugo'i ma-God-are jöhemu ejahobe juvoromo éhuro guomadeje. Korosire anamu guomadeje. ⁹Éhi ë'l'ego éhuni God-ro ajamamu huro dö maro ajiö namijamu hesi ihohuro iho iorol'ioroho iosiramuiromo börömo bëhe jiël'ëje ¹⁰ëhu'ego ae aho'obëhe ö'idöre raromarue sa'are raromarue sa'a uhure raromarue aribövioho noro Iesuare ihoho böröme höromo hu rajahiromo ague aho raromoromo ¹¹ae

aho'obëhe noro huruohoromo uvoruomoröhego: Iesu Keriso iae Bada hö uvoröhego. Ëhi uvo'iramu God Vavu hesi ihoho börömo bëhe jio'ë'e.

**Ramoramо'ere raromarue ariböviohu'o ave sa'are
raromoromo noro ironö'e ajivëvo'iröhe jöhoje.**

¹²Nasi ö mueno'e naehu jemë'o gemu mae hijamu jemëhu nasi jö ejehonövariijoho röhu jaruvo na öri ègobövire hijajohu'o nasi jöho ejehonövore. Ëho börömohoje. Juhuoni'o butubutu'o muoho avo'avoho vaerego jemë ma-mae jëvo'iro. ¹³Ëhesi bëhoho God-ro jemesi dë vövöbajo'oho huotövhajeje ëhuro huhu nimaje ëhi jië'e muoho vae'i nimoromo vae'irarijego. Ëhuni ëhi jië'e muoho vaere.

¹⁴Mu rabe rabe vaejë'oho nadi muoho bijönimoromo jö sisëho atoromo o jöho aho'ahëmi'irögoro a'i muoho ma-vaere. ¹⁵⁻¹⁶Ëhi ë'ë'oho jemë jö sisëho bogojëvo'i uhohu'o ma-mae jëvo'ë'e. Sareri sareri'l e aribövi sisëhu'o gemuore raromo'aruje röhu jemë God-are abozi harihu'e maemu jëvo'ë'e. A i'ovavuo'iröhe jöho röjëhiromo ëhuro jiji mujöru'ehu ramoramore ajivo'amajëhi ramoramore raromarue aribövioho ëhi ajivëvore. Jemë ëhi ë'ë'oho Keriso-are majaho rue'iramu naro uvo'ejo: O mabëhëjo. Jemë nasi jöho mabëhe ejeharije höjo. Na sa'are hiromo jöho majëhiromo muoho bogo ëma sivohoromo darugoho boremi'özjode höromo jemesi jöëni nimoronomorohë'i jöho jövo'ejo.

¹⁷Röhu hesi nani'o nani aëro anego'iramu guomevo'ë'e. Ëhi'l o'iramu nasi köho rue'iramu God-ro uvo'ë'e: Ëho na suvuore bojemijajëo. Röhu jemëhu hesi örire mae uehorovoromo mu vaejarujoho ëhu'o God bojamijaruje suvuoreje. Röhu nasi suvuorohu'o jemesi suvuorohu'o gemuoro jio'iramu God-ro garomo uvo'ë'e: Iae eni jiajëjo. Ëhuni aehu na ëhi anegego guomevo'iröhoho na huë mae jeve. Huë mae jevoromo jemë'o gemu mae nimorohewe. ¹⁸Naehu ë'ajëhi jemëro huë mae jioromo na'o gemu mae nimorohore.

**Paul-hu Timothy'o Epaphroditus'o rëmö'özjego
Philippi amore ö'iröhe jöhoje.**

¹⁹Iae na uehorovoromo uve: Bada Iesuhu nimë'ohuro ëhuro na mabüro Timothy nugö'ö'iramu jemesi örire ö'a'ajëjo. Ëhi ë'irodëro nege. Ëhesi bëhoho ö'oromo jemëhu diehi raromaruje jöho huro vuonorö'ö barovego na heromo huë mae jevoröhego. ²⁰Timothy-ro gemuëro na'o gemuoro uehorovoromo bogo döhemuoho a'i uhohu'o jemesi jöho uehorovajeje. Ëhi jië'e a göho bogobe. ²¹A ioro'iorohuro bogo Iesu Keriso-are jöho uehorovo'i jabesi muohemu uehorovarueje. ²²Röhu jemë gavarujoho iae hu a maeje. Harihehu vavu ajëmijaruëhi huro na ëhi ajemiromo Keriso-are jö ma hesi muoho vaebe rovë'eje. ²³Ëhuni na uehorovoromo uve: Ga'irode nasi muoho diehi jiamu gavë'iroho hu

nugö'ö'ejöjo ö'iröhego. Na ëhi nege. ²⁴Röhu naro uve: Badahu nimë'oho majae ma-bisemu barë'iramu na'o ö'ejöjo.

²⁵Röhu naro uvodeje: Nosi Christian öho Epaphroditus nugö'ö'ejöjo ö'ojöro. Ëhuremu iae mae höjo. Röhu avevejö'oho hu na'o bimuvoromo Satan'o muorovoromo mu vaejaje aeje. Mami'e jemëro nugö'öjarije huro rueromo jemesi ihore nasi vavaenohu ajeminövo'iröhego. Röhu naro hu sionëro nugö'öje. ²⁶Naehu hu nugö'ö'iroke hesi bëhoho huro ae aho'obëhe jemëni vavaenime. Vavaenimoromo nurunurume jemesi jöhuni. Ëhesi bëhoho jemë hejarije uvavamu: Hu guomo guome baejade hö uvamu hejarijohuni ëhuni. ²⁷Iae mae. Hu guomo guomo böröme baeromo guomo hesi jiadeje. Röhu God-ro hesi jöëni vavaenimoromo ajamijadeje. Bogo hesi jöëniho gemu vavaenimo'i a'li nani vavaenimadeje hu guomego naro huë vavaene gö'o döre baejöeni. ²⁸Ëhuni na nego avohe nugö'öjego ö'ojöro ëhuro hu ö'ego jemëro röhu maho garomo nimoroho'irarijego o ëhuro nasi nurunuruoho barëjanovoröhego. ²⁹⁻³⁰Ëhu'e jiaje hu ö'ego Badare ihoro börömo mae nimorohoromo rajahire. Ëhesi bëhoho hu uvadeje: Philippi amo rajoho ame égoböviro raromoromo Paul ajamijë'oho bogo eni jiajëo. Ëhuni naro jabu'o röromo è muoho vae'ejö uvoromo ëhuni hu ave sa'are hi'iröhe jöho bogo uehorovoromo guomo hesi jiadeje. Ëhuni ö'ego rajahire. O huhu è'adëhi ae rahu jabisi sino bogo uehorovo'i Keriso-are muohuremu uehorovë'oho ëhi jië'e aribövioho aho'obëhe rajëhinövore.

**Noehu God-are nunire mae riravo'iröhe öroho
ëho Keriso mae uehorovo'iröhe jöhoje.**

3 ¹Nasi ö mueno'e ijo tugoho'i jöho majëhi'ië'e. Badare öroro uehorovoromo nimorohore. Röhu ave majëhi'irode jöho mami'e uëvodoho röhu maho majëhijë'oho bogo u'uvelö'e. O jemë röhu maho hejë'oho ëhuro avo'avoho raromo'aruje. ²Ö sisëho val'ëne aribövioho gëvë'i raromore. Jaburo God-are muoho sisë'i röjëhijarueje. Ëhuni gëvë'i raromore. Jaburo uëvarueje: Jemëro Jew rajo muoho vaeromo jemesi sinoho tarivorejö ëhuro God-are nunire mae riravo'irarije. Röhu jabuhu röjëhijarue muoho bogo mu maehu jio'i ëho sino taritarivo'iröhe muoho jianove. Ëhuni gavë'i raromore. Ëhi jië'e aribövihuro sarerëmi'ë'ö. ³Jaburo sarerivoromo uvoruomajeje: No sine tarivo'amë'ëro ëhu'ëro no God-are aribövie javuajëjo. Röhu jabumë ma-döhemu God-are aribövie jioruomo'i a'li no uhohu'o God-are aribövie javue. Ëhesi bëhoho noro God-are Aru'aho hesi darugoho baeromo hu rajahiromo Iesu Keriso uehorovoromo nimorohë'i atarueje. No bogo uvarueje: Nosi muohu'o ihohu'o ave sa'are mae jiahüë'oho ëhuro God-are nunire mae riravo'ejärëjo. ⁴Röhu nosi muohu'o nosi ihohu'o mae jiahüë'ego ëhuro God-are nunire mae javuo'ibejo Paul nasi muohu'o ihohu'o mae jiehë'ëro

jië'éro uvo'ibejo: Na hesi nunire mae jevajéjo. A ioro'iorehu uvaruoho: No Jew rajo maëro javuë'éro Jew rajo muoho avo'avo ho vae'ego God-are nunire mae javuajé uvaruoho Paul naro éhi uvo'ibejo iae mae jio'ibejo rabëni naro jabumë iosirëmiromo Jew rajo maho na jevë'ego.

⁵Rahevamu hurae gemu barëjamu Jew rajo muoho vaejevoromo nasi sinoho tariojehareje. Nasi vëmu vavu'oho Israel rajëro jëvë'éro éhu'éro na'o Israel raje jeve. Benjamin-are uje gemuoho jeve. Nasi hijo mino'ehu Hebrew huëhu atobe Hebrew mu vaebe rovarëhi na'o éhi gemuoho ömajeje. O mu vaeröhe jögoru ejaje ae jevadeje. Pharisee ariböviehu jögoru e avohojöro uövuarüéhi na éhi'obe rovodeje. ⁶O God-are mu nimode ae jevadeje. Naro uvodeje: Jew rajo muoho God-are mue höromö ekaresia aribövioho sisë vaejëvo'i hijodeje. Jew rajo nosi jögoru ejaruuhuro éhuro mae javuo'ibejo ja uvo'ibejane: Nörö mabëhi mae höjö.

⁷Éhi jië'le mu mae iho mae jevamu iae marëjevajé uvodoho jaruwoho Keriso-are jöho uehorovoromo uvajeje: Éhuro sisërëjevë'lë höjö. ⁸Naro uvajeje: God-are nunire mae nami'irögöro naehu Jew rajo mu vaejë'ohuro mu ioro'iorohu'o noehu vaejego God-are nunire mae javuoröhe éhi jië'le mue aho'obëhe naehu uehorovë'oho éhuro sisërëjevo'ajëjo. Iesu Keriso nasi Börömo ga'irodoho éhemu börömoho höjö. Hesi jöëni mu ioro'iorohu musisi va'ène höromö boremi'øjë'e jeve éhuro naro Keriso bae'irodëro.

⁹Keriso baeromo hu'o gemuoro bimuvo'irodëro. Jaruwoho bogo nasi éma biririvoromo Moses-are jögoroho eromo uvajeje: God-are nunire mae jevajéjo. Bogo. A'i na Keriso mae uehorovoromo éhuro hesi nunire mae jeve. Éhesi bëhoho God-ro ajamuego no mae uehorovoromo hesi nunire mae riravarueje. ¹⁰Na nege nasi simanohuro dë vövöbajo'ohuro Keriso ga'iro hu ri'ojë'éro hesi darugohuro ajemijego marëjevojöro. Huhu huë vavaeni vi'ehi baejadëhi na'o éhi gemuoho baebe va'iro. Huhu mu sisë mu'uvahuo'i guomadëhi na'o éhi mu sisë garomo hörëro taemobe val'irodëni. ¹¹Sisëho hörëro taemobe va'oromo éhuro ijönö Iesuhu guomoromo ri'ojadëhi nani na'o eni jevë'ohuro nasi sino haho'ohu'o guomoromo éhi ri'ö'irodëro. Éhuremu nege.

**Paul-hu daruge aho'o bojamiromo Keriso-are
mu vaejadëhi no'o éhi ë'iröhe jöhoje.**

¹²Na bogo uehorovoromo uvajeje: Mami'e Keriso-are muoho baejë'éro mu sisë bogojevo'i bövie bise'e eni jevajéjo. Bogo éhioho uvo'i a'i Iesu Kerisoro hesi baejevë'ego éhuni hesi muoho bae'i biririvoromo muoho vaejajeje. ¹³Nasi ö mueno'e na bogo uvajeje: Naro Keriso-are muoho bae barëjë'e jevajéjo. Röhu ave muoho gemu uehorovajeje. Mue urimo vaebe rovodoho na bogo uehorovo'i ijönö jioröhe muohuremu bae'i sivohoromo é'o gavajeje. ¹⁴Naehu vaejöro Kerisohu nimajoho éhemu nunire bamoromo è ahorirëro vae'i biririvoromo é'o gavajeje éhuro ruahö'öromo

suvuoroho bae'irodéro. Ņsuvuoro hesi bëhoho God-hu uevego na Iesu Keriso'o gemuoro jevë'ero hesirire ajiomo'irodohoje.

¹⁵ Ae rahu a duvahonö'e uehorovarue aribövi javuë'oho naehu uëvodëhi ēhi uehorovonövo'ejo. O jemëhu jö gö uehorovë'iroho God-ro ēho röjëhi'iramu ga'a'aruje jemë bogo eni jëvo'iramu. ¹⁶ Ěhi jië'ego Keriso-are jö ejahobe rovaroho ēhi ejahobe va'eo. Ěhi jië'oho iae maeje.

¹⁷ Nasi ö mueno'e jemë gemuoro bimuvoromo naehu ē'ajëhi ēhi ē'onövore. Noehu öri mare jijiharuëhi ēhi jijiharue aribövioho gë avohoromo jemë'o ēhi ē'ore. ¹⁸ Röhu ave jöho majae aho'o majëhi'i hijodoho huë vavaene bogo bise'o vadu'oho baeromo röhu maho majëhi'irögoro ē'e. Ae aho'obëhe mu sisë vaebe jijihoromo īhuro Kerisohu korosire guomade jöho ahanovoruomajeje. ¹⁹ Ahanovoromo röhu noehu God börömoho hö uehorovaruëhi ēhi jabumëro jabesi sinohuremu nimajoho börömoho hö uehorovoruomajeje. Javoji'e muoho vaeromo mae höromo nimoronimorohë'i jijihoroumajeje. Ave sa'a hesi muohemu uehorovoruomajeje. Ěhu'ero jië'ero vën'i'e örire va'o hesi jioruome. ²⁰ Jabumë' ēhi jië' aribövie jioruome röhu nosi öri ari'oho bogo aveho jio'i ö'idöre jie. Ö'idöre jië'ego no raromoromo muebejarueje Bada Iesu Keriso no maro bamavuaje ahuro ö'idöre jioromo rueröhego. ²¹ Rueromo mue bövie bise'e ruahö'ö'amoröhe darugoho baeromo nosi sino haho'e u'uhavuajoho avohahuo'iramu gorosovoromo hesi sino haho'o mabëhe jiajëhi ēhi mabëhe javuo'amo'ē'e.

**Noehu uehore gemu baeromo nimorohoromo
mu maemu uehorovo'iröhe jöhoje.**

4 ¹ Ěhuni nasi ö mueno'e Badare öroro ēhi uehorovoromo biririvoromo riravore. Na jemesi örire dë vövöbajo'e aho'o uehorovëvego jemesi jöëni vavaenagajeje. Na jemesi jöho uehorovoromo huë mabëhe jevë'ero nimoroho avohajeje. Ěhuni na jemesi örire üeve: Nasi ö mueno'e biririvoromo riravorëjo.

² Naro Euodia jasi örire uave. Syntyche jasi örire uave. Badare magonahe gemuoho jëvaje Ěhuni uehore gemu baere. ³ Röhu ja na'o mue gemuoho mae vaejanue ae javë'ego naro ave jöho jasi örire uave. Ěmagonaho niö'ioho ajëmijego gemuoro avoho ari'iro. Ěhesi bëhoho ē magonahoho jaburo na'o gemu mae bimuvoromo God-are jö ma hesi muoho biririvoromo vaejareje. Jaburo Clement'o na'o mu vaejarue aribövi ioro'iorohu'o ēhi ē'areje. Jabesi ihoho mae raromemu raromo'iröhe ö'idöre jiaje surire ē jajivo'amë'eye. Ěhuni ē magonahaho niö'ioho ajëmine.

⁴ Röhu jemë ae aho'o Badare ae gemuoho jëvaje majae ēhi nimorohonövore. Röhu maho üeve: Nimorohorëjo.

⁵ Ma-sanuovoromo ae aho'obëhe jabesi öroro huë mae baejëvore. Badahu rueröhe majaho dunove. ⁶ Bövi bise'o rovë'iroho nadi

nurunurumo'irögoro a'i God-hu ajämijajoho huë mae uavë'i äninamiromo jemesi huë vavaenoho hesi öroro majahinövore. ⁷Jemëhu éhi ë'ë'oho God-are sanu'e mahuro noehu uehorovarue sanu iosiramijajohuro éhuro jemesi uehoroho dë vövöbajo'oho duohëho'iramu sanuovëho'ë'e Iesu Keriso'o gemuoro jëvë'ëro.

⁸Nasi ö mueno'e ijo tugoho'i jöho uë'ië'e. Aviëhi jië'e muohemu uehorovore. Jö mae ataruohuremu a duvahonö'e vaejarue muemu ahorirëro vaejarue muemu ajiro raromarue muemu dë vuëvo'e muemu aji ma'e muemu huë baejë'e muemu mu rabe rabe ma-maemu jiajoho rabe rabe noehu mae uehorovaruoho ë muohuremu uehorovonövore. ⁹Naehu rabe rabe röjëhijamu o vaejamu jemëhu garomo heromo baejarijoho éhi jië'e muohuremu vaenövore. Éhi ë'ë'oho God jö sanu'e bojamuijaje ahuro jemë'o hi'ë'e.

**Philippi ekaresiaeahu huë baeromo Paul-are örire suvuoro
bamahamu Paul-hu mabëhe uëvade jöhoje.**

¹⁰Bada'o gemuoro jevë'ego na nimorohevo avohe ë hesi bëhoho jemë majae bisemu ëgo'o bogo ajemijarijoho avevejöle röhu maho uehorovevoromo huë baejeverijohuni. Iae jemë na uehorovevobe rovarijeje röhu huë baejevo'irarije öroho bogo birohariate. ¹¹Na bogo uve: Jemë nasi huë vavaenoho bogo gevanovarije höromö bogo éhunioho jajive. A'i huë mae o huë sisë rovë'oho na uvajeje: Na rabe rabe jevajoho iae eni höjo. Éhi jië'e uehoroho iae na avoho baejë'e jeve. ¹²Bövi bise'o bogo eni jevajoho o marohë'e mae jevajoho iae na gavë'e jeve. Eni da'uegë'oho o hömevë'oho bövi bise'o marohë'e mae jevë'oho o inömo rumo'e jevë'oho o diehi jevë'oho naro uehorovoromo uvajeje: Na iae eni jevajëjo. Éhi jië'e uehoro hesi bëhoho birohë'e jeve. ¹³Keriso biriri bojemaje ahuro ajemijë'ëro éhuro mae o sisë rovë'oho na biririvoromo nami'irodoho eni jeve.

¹⁴Röhu nasi huë vavaeni ajemijarijoho ého iae mae ë'arijeje. ¹⁵Röhu Philippi amo rajohumë jemë'o iae gavarijeje. Na urimëli aevoromo Keriso-are jö ma majëhibe juvodevare evare naro jemesi sa'aho Macedonia vuonugo'i va'amu ekaresia ioro'ioro bogo ajemi'i jemëremu ijo bajo suvuoroho bojemiromo huë maho mana baejarijeje. ¹⁶Röhu jemesi sa'aho bogo vuonugo'i a'li Thessalonica amore va'o hijamu evare na bogo eni jevo'ego jemëro suvuore nasi örire nugöl'öli arinövariye. ¹⁷Na bogo suvuoroho nahoromo éhunioho uë'i a'li na nege jemëro suvuore bojemego éhuro ijönö God-hu suvuoro mana jemesi örire bojëmi'iröhoho bövi mae jiëhoröhego. ¹⁸Epaphroditus-ro jemesi suvuoroho nasi örire barovadeje. Éhuni uëve: Jemesi suvuoroho iae na baejë'e jevajëjo. Iae eni höjo. Marohë'e mae höjo. Jew rajehu mi God-are örire suvuoro bojam'i'anoromo vënire buejaho'ego God-hu ridi heromo vuëvonövadëhi jemesi

suvuoroho ëhi jie. God-ro garomo suvuoroho nimoromo huë mae jiajeje.
19 Röhu jemë rabe rabe bogo eni jëvamu gëvë'oho jemë Iesu Keriso-are ae
gemuoho jëvë'ego nasi Vavuohuro iae ajëmi'ë'e hu daruge aje bövie bise'e
bogo bise'o vadu'oho jië'ëro. 20 Röhu na nege God nosi Vavu hesi ihoho
ioro'iore gemu dö maro jioibe va'oröhego. Iae mae.

Paul-mëhu ijo tugoho'i jejëmijare jöhoje.

21 Röhu God-are aribövie Iesu Keriso-are aganoho aho'obëhe jejëmijajë
uëre. Christian ö mueno'e na'o gemu mae arijaruohuro jemesi örire
jejëmijö. 22 God-are aribövie aho'obëhe jemë jejëmijö. Röhu Rome
a börömo hesi osare raromarue God-are aganoho jaburo bövi maho
jejëmijö.

23 Bada Iesu Kerisoro jemesi aru'ahohu'o jioromo huë baeromo
ajëminövo'ë'e. Ahia mino'e.